

Hakisan tebing ancam nyawa

Penduduk risau kejadian jejas keselamatan

AZIMAH GHAZALI

GOMBAK – Kejadian hakisan tebing sungai berhampiran Dewan Sekolah Menengah Islam Al Amin, Batu 8, di sini bukan sahaja mengancam nyawa pelajar sekolah rendah dan menengah berhampiran malah pekebun juga turut menerima tempiasnya.

Dalam kejadian terbaru, pekebun, Kamaruzaman Mohd Isa, 57, dirundung kebingungan setelah sebahagian tanaman di kebunnya dihanyutkan arus akibat hakisan tebing terbitat.

“Kira-kira 20 pokok limau kasturi saya usahakan sejak lima tahun lalu sudah berbuah dan hampir boleh dipetik untuk dijual tumbang di tebing dan ada yang hanyut ke sungai.

“Saya sudah berkebun

kira-kira 30 tahun di tanah bergeran saya seluas 0.08 hektar di sini. Hakisan serius bermula tahun ini di mana tanah saya dengan sungai ini sudah lebih dua meter terhakis dari jarak asal,” katanya.

Kamaruzaman yang bergantung pendapatan dengan berkebun bagi menyara keluarga berkata, setiap pokok limau miliknya ketika itu, membolehkannya mengutip hasil limau antara lima ke enam kilogram.

Menurutnya, dia mengalami kerugian apabila limau kasturi yang boleh dijual dengan harga RM3.50 sekilogram lenyap dalam kejadian itu, manakala hasil tanaman lain seperti serai dan pokok pisang juga terjejas.

“Dengan keadaan terdedah tanpa pengadang ini, kita juga bimbang sekiranya



Kamaruzaman (depan) dan Mohd Nor semasa meninjau keadaan hakisan tebing sungai yang menjejaskan tanah kebunnya yang berada di sebelah kanan.

kanak-kanak sekolah bermain di sungai ini yang kita tidak pasti kedalamannya. Selain itu, terdapat dua lagi rumah berhampiran mungkin boleh terjejas,” katanya.

Mengulas aduan itu, Ketua Kebajikan Zon 9 Gombak, Mohamad Nor Hussain berkata, isu hakisan sungai itu sudah mendapat perhatian pihak Pusat Khidmat

Masyarakat (PKM) Dewan Undangan Negeri (DUN) Gombak Setia dan Jabatan Pengairan dan Saliran (JPS).

“Kita ada menerima aduan pihak sekolah dan mem-

buat lawatan turun padang beberapa kali dengan perwakilan Ahli Dewan Undangan Negeri (ADUN) Gombak Setia; Penghulu Mukim Setapak, Zuraimi Mohaini dan Ketua Zon 9 Gombak, Zulkifli Ibrahim.

“Arahan supaya kerja menaiktaraf sungai diberikan pihak ADUN Gombak Setia, selain kerja pengukuran bagi memasang batu sangkar setinggi 3 meter untuk mengatasi hakisan ini. Kita masih menunggu ia dilaksanakan,” katanya.

Pihak sekolah terlibat pernah menyuarakan kebingungan isu ini dan memohon supaya sungai berkenaan diluruskan untuk mengurangkan hakisan tebing terbitat.

Aduan isu sungai ini pernah disiarkan Sinar Harian pada April lalu.